

Octavia le ba 8

Mongwadi ke Jacqui L'Ange | Diswantšho ka Julie Smith-Belton



Octavia wa Oktopase o be a dula sethokgweng sa ka meetseng, meetseng a go tonya, a go hlweka leribeng la lebopo la Afrika.

Mo mosegareng, o be a etšwa ka leweng la maswika a phaphamala gare ga matlakala a matelele ebile a bapala seeding sa letšatši sa go phadima sa go tšwa godimo.

Go be go na le dikhorale tša mebala ya go phadima mo fase santeng, le mawa a mabotse a go ka iphihla ka go wona. Octavia o be a rata tšhengwana ya gagwe, ka gobane o be a na le makatika a go kgethega – o be a kgona go fetola mmala wa gagwe gore o swane le se a ikhuditšego go sona. O be a ka kgona gape go fetola le letlalo gore le be makgwakgwa bjalo ka maswika, goba le be le meetlwa bjalo ka khorale.

Se se dirile gore a kgone ka go kgethega papadi ya khuta o nyake, ka gobane bagwera ba gagwe ba be ba sa kgone go mo hwetša! Ka nako ye nngwe o be a khuta gabotse ka tsela yeo bagwera ba gagwe ba bego ba tlo lapa go mo nyaka ba ruthe ba sepele. Ka morago o be a tlo ba latela ka lebelo a gogela morago moela wa meetse.

Efela ka mehla o be a ema šelefong ya lewatle.

Ke fao botlase bja lewatle bo bego bo iša tlase kudu, tlase leswiswing. Octavia o be a tšhaba go ya fao.

“Ke nyaka go ba mo ke tla kgonago go itshwarelela ka se sengwe,” a botša bagwera ba gagwe ba potego ba seswai.

“Rena re subelela gannyane,” ba realo, “gomme re phela re boya.”



Ba lekile, efela ga se ba kgona go dira gore Octavia a ye le bona. O be a ba emela morumong wa leriba la šelefo, a lebeletše tlase leswiswing go fihlela a bona mebala ya go kganya e tšwelela.

Ka letšatši le lengwe go na le ledimo, meetse a be a galefile. Maphoto a mašweu a be a fihla mo mabung, gomme meboya ya ka tlase ga meetse e kgoromeletša mabjang a ka meetseng gohle, a dira gore dianemone di bine.

Octavia o ile a ya go nyaka bagwera ba gagwe kgauswi le šelefo ya lewatle – gomme meetse a ile a mo fošetša ka godimo ga leriba!

Moya o mo pshikološeditše tlase wa mo dikološa gabedi. Ka letšhogo, Octavia o ile a ntšha enke ye ntsho ya moela. Bjale o be a sa kgone go bona selo – ka mo a le gare a pshikologa ebile a ewa. Dipelo tša gagwe tše tharo di be di betha ka maatla, gomme mpa ya gawe e kwagala e ke bokagare bo ile ka ntle.

“Thušang!” a goeletša.



Ka leswiswing, o kwele e ke selo se sengwe se swere ye nngwe ya dithenthekele tša gagwe. Se be se kgopame se le boreledi.

“Ke go swere!” a realo Khalo wa letlapakgerere.

“Le nna!” a realo Stella wa hlapi ya naledi, a swara thenthekele ye nngwe ka letsogo la gagwe le letelele.

“Le nna wa boraro!” a realo PJ wa šaka ya dipatšama.

Ka o tee ka o tee, bagwera ba gagwe ba ile ba tšwa ka leswiswing gomme mongwe le mongwe a swara thenthekele. Lefase le ile la thoma go iketla. Octavia o ile a itshwarelela gomme ba mo hlahla go boela tšhengwaneng ya gagwe.

Ba rile go hwetša lefelo la maleba, Ray a phurulla maphego a gagwe a maphara go ba šireletša moyeng wa ledimo, gomme ba ile ba batagana, ba thabetše go ba mmogo.

Gomme ka lebaka la makatika a Octavia a go kgethega, o ka se tsebe gore mogwera o tee o thomile kae gomme ba bangwe ba feletše kae!



Octavia le ba 8

Mongwadi ke Jacqui L'Ange • Diswantšho ka Julie Smith-Belton

Mehopolo eo le ka buang ka yona

Octavia o be a tšhaba go tšwela pele go feta morumo wa lebopo la lewatle. Ke eng se o se tšhabago? Ke eng se o ka se dirago go kwa bokaone ge o ikwa o tšhogile?

O kgopelwa go re anegela mabapi le nako yeo o bego o tšhogile gomme wa thušwa ke motho goba selo se sengwe.



Go bona

Eya letlakaleng la mošomo mo: <https://nalibali.org/story-supplies/activity-sheets>

Šomiša seswantšho sa mafelelo sa kanegelo go go thuša go kgabiša bagwera ba Octavia ka mebala.



Go bala

Bala kanegelo gape le go dira lenaneo la dilo ka moka tše di hwetšwago ka lewatleng.




Go ngwala

Dira puku ya sebopego sa hlapi ye e sego ya ngwalwa selo goba kgopela motswadi/mohlokamedi gore a go direle yona. Ngwala o be o swantšhetše kanegelo mabapi le bophelo bja ka lewatleng ka pukung. Goba thala diswantšho le go kgopela motswadi/mohlokamedi gore a ngwale mantšu ao o mmošago ona.



Go dira dilo

Penta bokagare bja lepokisi gomme o hlame lefase le lennyane la ka meetseng o šomiša magapi, maswikana le dibopiwa tša ka lewatleng le dimela tše o di dirilego ka didirišwa tša dilo tše di šomišwago leboelela le pampiri ya go kgabišwa ka mebala.



Go bapala terama

Itire o ka re o sebopiwa sa ka lewatleng goba semela sa ka lewatleng: ebela o ka re o kelepo, rutha bjalo ka hlapi ye nnyane, sepela ka lehlakore bjalo ka letlapakgerere le go sepela ka meetseng bjalo ka Oktopase.

